



**MAMBA  
MAGU  
MBOG'ANZEMBI**

COMPOSÉ  
PAR WATSON GOODMAN

GRATUIT—  
NE DOIT PAS ETRE VENDU

**“Mamba magu mbóg’aNzemi” présente une série de versets extraits des Saintes Ecritures et classés par sujets. Je suis persuadé que le meilleur commentaire des Ecritures est la Bible elle-même.**

**La Parole de Dieu vient d’en haut et elle apporte réellement le secours aux coeurs qui ont faim et soif de la justice. Si une personne se repent et abandonne ses péchés, si elle invite le Seigneur Jésus-Christ à habiter dans son coeur, croyant fermement en Lui comme en son Sauveur personnel, Il lui fera part de Sa joie et de Sa paix. C’est là l’expérience que j’ai faite en 1937 et depuis lors, ma communion avec le Seigneur n’a jamais été interrompue. Je vous supplie de vous soumettre à Lui, en l’acceptant **MAINTENANT** comme votre Sauveur et Seigneur, si vous ne l’avez pas déjà fait.**

**—Watson Goodman**

# NZEMBI NGUA TING'ABAATA

1

Jean 3.16

Nzemi â-mono ting'abaata yalótala, nâ-sindala Muan'ande walékika mu niut'abo, mu ndé, Babaka-silala mamba mamu niut'ande basiba-kua ve, bo ka móyi ba-ka na nde wamubu na mubu.

Apocalypse 1.5

Jésus Christ ni wuNzemi â-sóla gu léku, nde yivóna siabakumu bamalongo mótsi. Nde ni waa-tondo bésa-béna. Nde ni wâ-kagala bésa-béna na mamba malâ-sadanga mamabi mu mbat'anzin'ande yiyâ-pégaga.

1 Jean 4.8,9

Babaave-mono bambegi tinga basama-yika na Nzemi ve. Nzemi ni ngua tinga. Tinga yiNzemi â-mono bésa-béna, laa-yaba yo mu tsindaga gu ndê tsindaga Muan'ande walékika mu bulongo buu, mu ndé, Bésa-bé lé-fua móyi mu nde.

Jean 13.1

Jésus â-baa ama-yaba . . . ndé, Lécese la-mata mu bulongo buu mu gabaga gu mbóg'aTaata léma-too. Ndê tondongo baata bendi bamu bulongo buu, yitóndili sindê tondongo bo nasia gu léku.

Jean 1.1,14

Nzemi na pa-sada tsenge yotsi, Lébiga ndita lóna lena. Lébiga muene lâ-baa ni Nzemi nde muene. . . . Lébiga lâ-kétaga mutu bulongo buu. Lô lâ-tságalanga va pfuesi abésa. Lo lâ-baa na ting'abaata na bimbuli. Nilâ-monongo gu ndê baadanga na buyimba. Buo ni bu Muana walékika aa-baga na Taat'ande.

1 Timothée 3.16

Lébaa-lele, bó, Tsiamba lélaa-nongoso bésa-bé na Nzemi; tsia mténe, paga mu tsikasa. Ndê bongó nzim'abaata, nâ-monono na baata batoto guni. Lenióni Labuyimba nâ-vee nde mubénga.

Batóma baNzemi bagu yulu nibâ-monono na nde. Baata bâ-simbalanga mamba mamu niut'ande va pfuesi abaata bamakaka makaka. A bââna nibâ-silalala mamba mamu niut'ande. Nzemi nâ-kómasa nde gu mbóg'ande gu yulu.

Mamba muene mótsi nimâ-kuania na maKumu âpa-yambala na muyélisi abaata mabiga mendi na bukala, ndé, "Mukaasa waavepa-bugu bitsiga na babagala na-mene dimi. Muana wunde ka-bóta, lébagala. Niba-lóga nde Emmanuël." (Sópala guandóga muene ti, Nzemi na bésa-béna a-li.) —Matt. 1.22.23

## Colossiens 2.9

Nzemi, ndé, Nzim'ame yótsi mu niut'aChrist yi-li, yi-monono mu niut'andé.

## Matthieu 8.29

[Badéma] nibâ-dumunu misima, bó, "Muan'aNzemi wuu, bésa-bé tsia nâ. ?Lékese ki pa-too ve, weka-yada gu yi-songisi bésa?"

## Matthieu 17.5

Pierre baa ki yambala aayambala, lébungî latutî nilâ-dibaga bo vââna mâ mâ mâ mâ. Bâ-yóga ndag'amutu gutso lébungî, ndé, "A wuunuwu ni Muan'ame wamutéma wumee-tondo. Ki-yógalani nde."

Tóm'aNzemi nâ-lele nde, ndé,

"Lénióni Labuyimba nilé-sótaga gu mbóg'awe. Ngudi aNzemi ngua biótsi, yé ni yika-guasa we. Lé ni lémuana muene wuweka-bóta baka-lele nde, bó, Nde waave-na tsia ni tsiamba, nde Muan'a-Nzemi." —Luc 1.35

Babaa-meme, bó, Jésus Muan'a-Nzemi, Nzemi ka gutso mitéma a-ka. Bo na baNzemi vââ mutu ka mumósi. —1 Jean 4.15

## Jean 10.36

[Jésus, ndé,] "?Mfua na wu-Nzemi â-bânda, ndé, We-buéyi we-yende gu toto; wó ka ni wubé laa-lele ti, We Nzemi wee-vongolo, mu me-lé, mé, Me Muan'aNzemi?"

## Jean 9.5

Va me ki mu bulongo buu, me ni waa-sada baata bótsi yivele.

## Jean 11.25

Jésus, ndé, "Me ni musuli ababâ-kua, me ni waa-fuisa bo móyi. Babaa-silala mamba mamu niut'ame, bo na ba-kua, ndila móyi bââ-fua."

## Jean 13.13

Jésus, ndé, "Bé laa-te me ti, Mulóngisi, na Kumu. Bé buédi laa-lele. Me ni bó me-li."

## Jean 8.23

Jésus, ndé, "Bé bisi toto guni, me muisi yulu. Tsenge yii, yabéna. Mesa-li muisi muu ve."

## Jean 4.25,26

Mukaasa nâ-lele Jésus, ndé, "Me-yebi, mé, Kum'abaata wubaa-kua tsongo, bó, Na-ya (nde ni wubaa-tede, bó, Christ), na-yada. Nde mana yada, nde ni wuka-sópala bésa mamba mótsi." Jésus nâba-kalà nde, ndé, "A wuu ni me waa-yambalà na we."

## Jean 6.35

Jésus, ndé, "Me ni biéla bibia-fuisa baata móyi. Babaa-sa mi-téma mu me basiba-kua na nzala ve; babaa-silala mamba mamu niut'ame basiba-kua na peyi amâmba ve."

**Matthieu 20.30,34**

Bapepidi boli bâ-tsagalanga va mbad'anzila, bo bâ-yôga tsanga, bo, Jésus ndôn'aa-lôta; nibâ-pamaga na kaya, bo, "A Mulóngisi, mutégad'aDavid, mo bésa tinga!" . . . Jésus â-mono bo tinga, nâ-bembe bo mu misa. Va keti avââna misa mabo nimâ-bueye. Bo nibâ-bugu nzila bó na baJésus.

**Luc 5.4-6**

Jésus a-mana yambala, nâ-lele Simon, ndé, "Tsindaga mbungu gu mutem'amudiba va pedi yidiba, be na bambegi. Bé lo nilé-bóma batchui. Simon nâ-kala nde, ndé, "A Mulóngisi,

butugu buótsi bésa lésa-begi biolo ve ndila buaganga mam-busu, tchui ti mumósi wulaa-bóma ve. Mee-gabagala ka mu ndag'awe yiwe-tsugi yéna." Bâba-buaga, nibâ-bóma batchui mfua bo ve, mambusu mabo nimâ-voto kasaga na mbam'abatchui.

**Matthieu 15.29,30**

Jésus . . . nâ-kóma gu yulu mukongo, nâ-tsagala góna. Baata mfua bo ve nibâ-yende gu mbóg'ande, nibâ-béta na babâ-tsótsaganga, na bapepidi, na bangua biku, na bimeme, na babéda bakima mfua bo ve. Nibâ-témba bo va misa maJésus, nde nâ-beelesa bo bótsi.

## JESUS CHRIST WA-SADA BIOTSI, NDE KUM'ABIOTSI

Nzemi â-sada biotsi ndila mu niut'a Christ . . . na bibi-li gu yulu na bibi-li mu-toto muu, na bibaa-mono na misa na bibaave-mono na misa, na bangua buyumunu buamulinga mulinga, na bangua bunono bua-sada peti mamba balaave-mo na misa. Nzemi ni wâ-sada bikumbu muene biotsi, biotsi mu niut'ande bi-lidi. —Colossiens 1.6

### Ephésiens 3.9

[Paul, ndé,] “Nzemi musidi abjotsi nâba-lele me, ndé, Yende yi-lele baata tsiamba lémêpa-baadanga na lo gutso mutéma, lo lé-baa velê.”

Mu tsugu yii Muan'a Nzemi ka ni waa-tooso bésa-béna matóma ma Taat'ande. Bó na nde ni babâ-sada biku biotsi. Nde ni wu Nzemi â-bânda, ndé, Weni-baa Kum'abiotsi na mumua-sika tsenge. —Hébreux 1.2

Christ â-kua, nde nâba-sóga, mu ndé, Me-baa Kum'abaata bótsi na babâ-kua na baba-li mióyi. —Romains 14.9

### 1 Corinthiens 1.9

Nzemi asa-dimbala mamba mandee laga, ndé, Meni-sada ve. Nde ni wâ-bânda béna, ndé, Bé na ba Muan'ame Jésus Christ lé-baa na yinongo.



# JESUS CHRIST NI WAA-PASA MIPAMA MIABAATA

Actes 10.42

Jésus ni wâ-tôma bésa mu yisimbala mamba mendi gu mbóg'abaata bótsi na mu sigasati, Jésus ni misamba wuNzemi â-vee buyumunu, ndé, A-pasa mipama miamamba mabaata na baba-li mióyi na babâ-kua.

Romains 2.4-6

Nzemi aa-mono ting'abaata mfua yo ve, nde ni wu-li na mutéma bula, nde ni waa-vókada mamba mabaata . . . ?bé ka nde laa-lengese? ?Bé lésa-yebiti, Ndee mono ting'abaata, mu ndé, Ba-gele mamba ve? Mu bunono buamitéma miabéna, bé

balaave-yóga mamba, bé vââ ka kési aNzemi laa-nenese. Létsugu lénde ka-pasa mipama miabaata bótsi, asaka-dimbala, ndé, A wuu a-bingi, a wuu a-kui mbele ve. Lé ni létsugu lékési aNzemi yika-monono. Nzemi na-kala baata bótsi mapéla mu mamba mabo baa-sada.

Romains 2.16a

Mââ ni mamaka-póla mu létsugu léNzemi aka-pasa mipama miamamba mabaata bótsi mabo bâ-suegenge gutso mitéma. Jésus Christ ni wuka-lele lébiga lakii.

# MUPOTILI ABAATA NDILA CHRIST

**Jean 14.6**

Jésus, ndé, "Me ni nzila, me ni ngua bimbuli, me ni Mafuisi abaata móyi. Muta asipa-sondala gu mbóg'a Taata léta ve, tsómi ki pa-yáda gu mbóg'ame."

**Jean 8.24**

Lé ni léme-léli béna, mé, Bé nilé-kua ndila mu sadanga mamba mabéna mamabi mââna. Bé ti laa-bisa singa ti, Me ni bó me-li, bé nilé-kua mu sadanga mamba mabé mamabi mââna.

**Actes 4.12**

Baata basi-fua móyi mu niut'amutu mukima ve. Nzembi asaba-vee baata ndóga kima mu

toto muu yibo baa-fua móyi mu yo ve.

**Jean 10.9a**

[Jésus, ndé,] "Me munio nzo. Baata babaa-ningala mu munio nzo muene mu niut'ame, niba-fua móyi."

**Hébreux 7.25**

Lé ni léndee fuisa baata móyi babaa-sada mitéma mu Nzembi mu niut'ande bo móyi ba-vida ve. Nde sa-niaga Nzembi bondo mu niut'abo ve, mu nde li muyikala.

**Hébreux 5.9**

Vââ ni va Nzembi á-lele, ndé, A wuu ka ni waa-bueye. Nde ndila ka ni wubabaa-yimbasa nde baa-fua móyi mubu mu nde.

## Colossiens 1.12-14

Kakasani Taat'abésa-béna mu mono guabubue, nde ni wâ-bueyese béna mu bugu lébuli na baana bendi babaa-tsagala mu yivele. Nde ni wâ-masa bésa-béna gutso mamba mayipfundu, nâ-bugusu bésa-béna na yitsuku siaMuan'ande wamutéma. Mu niut'ande bésa-béna nilâ-potogo. Nde nâba-sindala mamba mabésa-bé malâ-sadangani mamabi.

## Apocalypse 5.9

[We, Jésus,] We ni wubâ-bóma. Mu kua gu wê-kua, wêna-potolo Nzembi baata bamakaka mótsi, na bamandaga mótsi, na batsenge yótsi, na bamalongo mótsi, mu

mbat'anzin'awe yiyâ-pógaga.

Nzembi ni wâ-bugu bé na baJésus Christ mutu mumósi. Nde nâ-yabasa bésa-béna mamba mendi mambuli mu niut'aJésus Christ. Nzembi, ndé, Bé léma-ditana neme mu niut'ande, bé ndila yimbasanga me tsugu yótsi. Bésa-béna léma-mana potogo mu niut'ande. —1 Corinthiens 1.30

Nde nâ-sindala niut'ande mu mbat'abésa-béna, mu ndé, Memana bo mamba mamabi mótsi, ba-baa baata beme, me pénza me-baa kum'abo, bo mitéma mi-tendege, ba-baa na mitéma mbuaga mu sada mamba mamabue. —Tite 2.14

# NZIN'ACHRIST NDILA YO PENZA YAA-NONGOSO BAATA NA NZEMBI

**Ephésiens 1.7**  
Bésa-bé léma-potogo mu nzin'a-Christ yâ-pógaga. Nzembi nâ-sindala bésa-bé mamba malâ-sadanganí mamabi mu légétsa léndê gétsa bésa-béna.

Kiti mu kua gu ndê kua, Nzembi a-bingisi bésa-béna, ?mfua na diba gu ndee diba bésa-béna, kési aNzembi yika-bisa fua mu mbat'a-bésa-béna? —Romains 5.9

**Hébreux 9.14**

?Mfua na nzin'aChrist yo yisi-tendele mitéma miabésa-béna ve? Va mamaave-na tsongo mamaa-tsua léku maka-fua, bésa-bé léka-bueye mu yimbasa Nzembi, nde waave-kua. Christ nâ-sindala

niutu mu ngudi Lénióni Labuyimba Lamubu na mubu, ndé, Lo ngana wó, Léfaga lélaa-bueye na Nzembi mubu.

**1 Jean 1.7**

Bésa-bé ti laa-tsagala gutso yivele siNzembi nde muene a-li, bésa-bé vââ mutu ka mumósi. Nzín'aJésus, Muan'ande, yaa-tendele bésa-bé mitéma, mamba mamabi maa-fua mótsi.

**1 Pierre 1.18,19a**

Yabani ti, Sibâ-potolo béna mu kagala béna na mamba mamaave-na tsongo . . . a bîku bibia-ganzana ve. Sibâ-potolo béna mu sio, ndila nzin'aChrist yiyaave-yebene na yikumbu.

# FUA MOYI MU SILALA GUAMAMBA MAMU NIUT'ACHRIST

11

1 Jean 5.4

Baana ba Nzembi bubue ba-póla mamba mabulongo buu lévu. Babaa-silala mamba mamu niut'aJésus, bââ ka ni babaa-póla mamba mabulongo buu lévu.

Mamba muene bâ-kóma mu bó, Bé na béna lé-yaba ti, Jésus ni Kum'abaata wubaa-kua tsongo, bó, Na-ya; nde ni Muan'a Nzembi, bé lé-fua móyi mu niut'ande mu silala gu bé laa-silala ti, Wó ni nde. —Jean 20.31

Ephésiens 2.8,9

Bé ka móyi laa-fua ndila mu gétsa gu Nzembi aa-gétsa béna, mu silala gu bé laa-silala mamba

mamu niut'aJésus Christ. Ndila mu tébala gu Nzembi aa-tébala, ndé, Ba-fua móyi, . . . A mu mamba mabé laa-sada mamabue mââ ve, bé léka-dumu matuku ti, Mââ ni mabésa laa-fua móyi.

Baata ti bó na baJésus Christ mutu ka mumósi . . . tsia lambuli ndila mu silala guamamba mamu niut'aJésus, na mono guabaata tinga. —Gal. 5.6

Nzembi ama-mana bésa-béna béngasa mu silala gu laa-silala mamba mamu niut'ande. Bésa-béna na nde lé-ka na yinongo mu niut'aKum'abésa-béna Jésus Christ. —Romains 5.1

## 12 NZEMBI TINGYABAATA AA-MONO

Lamentations 3:22,23  
Tinga yi Nzembi aa-mono baata  
yisa-fua ve, yo yisa-sika ve.  
Tsugu yótsi yo ndila yóna yéna.  
Nde ngua lébegi lamamba!

Matthieu 18.11-14

Me Wâ-bongo nzim'abaata mē-  
yada mu mé, Me-saga babaa-  
niambana, me-pósa bo gu bo ba-li,  
ba-fua móyi. Vatso béna mutu  
a-baa na mukam'abataba,  
mumósi a-niambana, ?mââna aka-  
bisa niaga makumi mabataba wa  
na bataba wa bââna gutso pindi,  
ndé, Mepaye gu yi-saga wu-  
niembini wóna? E, nde ndila  
yende gu saga. A-mana sololo, na-

sangala. Yisengili sindee sangala  
wundê sololo wóna niyi-lótala  
sindee sangala bandê sála ná bo  
bamakumi mabataba wa na  
bataba wa bââna. Na móni  
aTaat'abéna wu-li gu yulu asa-  
tondo, ndé, Muan'angebe ti  
mumósi a-niambana ve.

1 Pierre 1.3

Lé-kakasani Nzembi, nde  
Taat'abéna-béna Jésus Christ!  
Nde nâba-gelese béna-béna nzima  
kima mu tinga yindee mono béna-  
béna mu mbat'asóla gu ndé sóla  
Jésus Christ gu léku. Yé ni  
tsong'abéna-béna ya-fua guamóyi.

**Esaïe 1.18**

Nzemi, ndé, Yadani, mé ni mudibi abéna, bé na lé-baa na mamba mamabi, mo na ma-baa nzuembé, meni-mana mo.

**Esaïe 55.1**

Nzemi, ndé, "Yadani bé bótsi balaa-mono peyi amâmba, bé na léve-na badolo, yadani gu tsia na gu nio, bé lési-futu ti futu ve."

**Matthieu 11.28**

Yadani gu mbóg'ame, bé bótsi baléma-roko na balaa-kegele mu papa mikunu, me-vómasa béna.

**Apocalypse 22.17**

Lénióni Labuyimba bó na baata ba-Lébundu LaJésus (bo ngana

mukedi ande) baa-lele, bó, Yada! Na babaa-yóga mamba muene na bo bubue ba-silala, bó, Yada! Babaa-kua na peyi amâmba, ba-yada, ba-niedo mâmba mamaave-na paga mamaa-fuisa baata móyi.

**Jean 7.37**

Létsugu lamubéka lélénéni lasikala, Jésus nâ-temene, nâ-pamaga na ndaga yiyinéni, ndé, "Baata babaa-kua na peyi amâmba, ba-yada gu mbóg'ame, ba-nio mâmba."

**Jacques 4.8a**

Sadani mitéma mu Nzemi, nde na nde na-sa mutéma mu béna.

# 14 BAANA BANZEMBI NDILA BAKIMA BAANA, A BOTSI VE

2 Corinthiens 6.17,18

Kumu â-lele, ndé, “Matani yatso baata muene, bé lé-kagaga na bo. Yâ-télani na bikumbu bibibi, tso meka-mo bé buédi. Meka-baa Taat’abéna, bé léka-baa baana beme babakaasa na bababagala.”

Philippiens 2.15

Bé vââ nilé-baa balaave-kua mbele mu tsia ti lémosi ve, bé balaa-tsagala vatso baata bababi baba-li na pfudu. Bé balaa-kémba va pfuesi abaata muene na mabiga mabaa-fua móyi mu mo, bé vââ ka ngana balembi babaa-lóla vatso yipfundu.

1 Jean 3.10

Vââ ka ni va laa-yabani ti, A bââ baana baNzemi, a bââ baana badiable. Babaave-sada mamba mama-yebene basa-li baana baNzemi ve, na móni abo babaave-mo ting’a-bambegi.

Romains 8.14,15

Baata baLénioni Labuyimba laa-kémba na bo nzila mósi, bo vââ ka baana baNzemi. Bé vââ lésiba-regene ngana bavéga ve. Nzemi ama-vee béna Lénioni Labuyimba, mu ndé, Bé lé-baa baana bendi. Bésa-bé ka mu ngudi Alo laa-sangala Nzemi ti, Taata.



# NZEMBI BUNI AA-YAMBALA MU LAMALAMA 15

Romains 13.13,14

Lé-baadani na mamba  
mamasónḁa Lé-niagani  
munzunza na lélengi na buvesi  
na bupupulu na mapaga na  
ngusu. Bongani biku bia-  
Kum'abésa-béna Jésus Christ.  
Tamanani léniungi lamamba  
mamu maniutu mabéna.

Galates 5.19-21

Mamba mamaa-mata gu mióyi  
miabaata, bésa-béna ka mo laa-  
yaba. Mamba muene: na tsanda,  
na buvesi, na bupupulu, na  
yimbasa guamatsónḁa, na  
malongo, na yibene, na lébele, na  
paga, na ngusu, na bukeni, na  
mulóta, na kabana guamabuli,

a bââ na labo, a bââ na labo, na  
pida ya-vida bambegi, na lélengi,  
na munzunzu, na mamba makima  
mamabi mótsi peti mo. Me bée  
mema-lele béna, meeba-gabagala  
bé lébala, mé, Baata babaa-sadā  
mamba muene basakaba-baga  
buyumunu buaNzembi ve.

Proverbes 23.31,32

Yâ-kengese malama mabukeni  
mamaa-fua gutso tsóba, mamaa-  
yingaga gutso kopo. Mo ngana  
bukeni buamiangala miatedi ya  
ndee kaga.

Baata babaa-nióngala malama  
mabukeni busi ki kia ve, bo ka  
langa baa-langa, busi tí vinda,  
niba-mono! —Esaie 5.11

# 16 SILALA GUAMAMBA MAMU NIUT'ACHRIST NA MUNIO TSITSA VE

Matthieu 7.21

A babaa-kayila me ndila na mikaya penza, bó, A Kumu; baa-toodo gu mbóg'a Nzembi gu yulu gu ndee yumu ve. Babaka-ningala góna ndila babaa-sada mamba ma Taat'ame mandee tondo, ndé, Ba-sa.

Luc 6.46-49

Jésus, ndé, "Mamba mameelele béna, bé yóga ve, sibé laabatede me ti, A Kumu, ka yiki. Mutu a-ya gu mbóg'ame mu yóga mamba meme, ndee sada mo, mee-fuanasa nde vââ ka ngana mutu waa-tóngá nzo. Nde pa-bóka lébéla mfua lo ve. A-bóka a-bóka

a-bóka, nâ-bakasa, lémania, nâ-tóngá va yulu lémania muene. Mfulu â-banda nogo. Nâ-nogo nâ-nogo nâ-nogo, nzeli wótsi nâ-sada tóná, nâ-pógála. Mupéla nâ-sada mfua nde ve. Nâ-góba mu nzo ngubû ngubû, nzo pópa ve, mu ndé tóngá yo va yulu lémania. Mutu a-yóga mamba meme, nde mo sada ve, nde vââna aa-fuana ngana mutu wâ-tóngá nzo va yul'atoto, nde lébéla bóka ve. Nzeli nâ-pógála, mupéla nâ-sada mfua nde ve, nâ-góba mu nzo muene ngubû ngubû. A vââna nzo niyâ-bóndaga, niyâ-nianzaga matsuka matsuka.

**Ephésiens 5.6**

Rambalani, baata baka-sombo béna na mamba mamaave-bueye. Mââ ni mamaa-kambala Nzembi kési gu mbóg'abaata bangua muvongo, ndé, Meka-vee bo mambele.

**Jacques 1.22**

Baadani basidi bamamba ma-Nzembi, a ndila bayugi bana matchui péenza ve. A gó ni yóngasa guabé muene mu yaba guati, Mua nzi yimee-yaba yéna ni yimee-fua móyi mu yo.

**1 Jean 3.7,8a**

A bangebe baa, yâ-singani ti baa-sombo béna. Baata babaa-sada mamba mamayebene, bââ ni

baata babayebene ngana bu Jésus Christ a-li. Babaa-gala na mamba mamabi sada, bââ ni baana badiable. Diable ni wâ-sadanga bubi keti atsómi nasia lolo.

**1 Corinthiens 6.9,10**

?Bé lésa-yebi ti, Baata bababi basaka-baga buyumunu bua-Nzembi ve? Na bivesi, na baata babaa-yimbasa matsónaga, na bangua bundiga, na babaa-sada mamba mambónzi, . . . na bayibi, . . . na balengi bamalama, na bangua biyembili biatsuakalá tsuakala, na mibóngi, bââ bótsi basaka-baga buyumunu bua-Nzembi ve.

**18 SADA GUAMAMBA MAMABI GUA-TSUALA  
LEKU LAMUBU**

**Romains 8.6**

Babaa-landa mamba mama-  
mata gu mióyi miabo muene, bo  
baa-kua na yinióngá siamamba  
muene. Va mamba muene maka-  
fua bo, gó ka ni kua guamubu.  
Babaa-tamana maniyutu mu landa  
mamba maLénióni Labuyimba,  
bo kuadanga na yinióngá  
siamamba mendi. Gó ka ni fua  
guamóyi wamubu na mubu na  
baada na mitéma miasóna.

**Romains 5.12**

Wá-sógala tsia télébi sada mu  
tsenge yii, mutu ndila mumósi.  
Léku nilá-yada mu mbat'alébi  
léndê sada, léku nilá-kógala

baata bótsi, mu bótsi bama-  
kógala mamba mamabi sada.

**Jacques 1.15**

Nzal'amamba muene ma-kuata  
baata mu mitéma, yo sada ka  
mamba mamabi. Ba-mana mamba  
mamabi sada, a lé ka ni léku.

**Apocalypse 21.8**

Baata bangua mitéma miakolo  
mu singa mamba peti mo, na  
bangua pfudu, na bangua mamba  
mabupupulu, na babumi babaata,  
na bangua buvesi, na bangua  
malongo, na bangua bikoko,  
na bangua mamba moli moli,  
baata muene bótsi niba-kua léku  
lamoli gutso lébéla lamulúdi  
ambuaga yiyaave-dina yambuli.

Jésus nâ-kukulu va pedi lekési lamfumbi, nâ-témba lékaka va yul'alo. . . . Jésus nâ-lele lébagala muene wâ-baa 'ama-kua, ndé, "A mufudu wuu, Sôga!" Mufudu nâ-sôga, nâ-tsagala, nâ-tubu yambala. —Luc 7.14,15a

Jean 11.43,44

Jésus nâ-yambala na ndaga yiyinéni, ndé, "A Lazare, póla!" Vââ ka ni va mfumbi â-póla, miogo na mila bâ-gada na bifuti biamatsanda . . . Jésus nâ-lele bo, ndé, Niangalani nde biéna, bé lé-niangasa, nde muene a-yende."

Me ni wu-li móyi. Mê-baa mema-kua, me ndóga mema-sôga, me móyi me-ka mubu na mubu. Me ni

wu-meni léku. Me ni Kum'abaata babâ-kua. —Apocalypse 1.18

Jésus, ndé, "Taata aa-tondo me, mu mee-sindala niut'ame, mé, Me-kua. Me-kua, meniba-fua móyi. Mutu ti mumósi waa-toga me bóma, ndé, We-kua ve. Me muene ni waa-sindala niut'ame, mé, Me-kua. Me-kua, me na ngudi yaba-fua móyi. Bó ni bu Taata â-lele me." —Jean 10.17,18

1 Corinthiens 15.25,26

Christ aka-yumu nasi Nzembi aka-mana bikumbu biótsi bibiaganza baata, Christ ndila ni wuka-baa Kumu. Yikumbu sisia-ganza baata sibaka-sikala sio mana, ka léku.

Deutéronome 5.7-21

Nzemi, ndé, Yâ-baa na bikoko.  
Yimbasa ndila me muene.

Yâ-baa na bakósi, ti peti  
bikumbu bibaa-paka, ti biagu  
yulu ti biagu toto, ti biagutso  
manzeli (wó, A bii ni bimee-  
yimbasa).

Yâ-yimbasa bio. Me Mubu na  
mubu, me Nzemi, me na  
léguebi.

Yâ-tata ndóg'a Nzemi  
matsuaka; nde ná-tsisa babaa-  
tata ndóg'ande matsuaka sigi.

Kele létsugu lapiga, we-  
yimbasa Nzemi mu lo. Bó ni bu

Mubu na mubu á-lele we, ndé,  
We-sada, Sala tsugu samana, we-  
mana bibénda biawe mu yo.

Yimbasa ngu awe há taat'awe,  
weka-dinga na móyi mu toto  
muu, weka-mono buédi.

Yâ-bóma baata.

Yâ-sada bundiga.

Yâ-yiba.

Yâ-kutulu bambegi mamba.

Yâ-nióngala biku biabangeni,  
wó, Bi-baa bieme — ti mukedi  
angeni, ti nzo nde, ti nungi ande,  
ti museli ande, ti bataba bendi,  
ti peti yikumbu siangeni, wó,  
Si-baa sieme.

**Job 34.21,22**

Nzemi aa-mono mamba mótsi mabaata baa-sada, a wuu na mendi a wuu na mendi. . . . bo yisuémili ti pésa ve.

**Luc 8.17**

Mamba mabaa-suege nima-tubugu mótsi, na móni amamba mamakundu masaka-suemene ve, nima-póla mbedi.

**Psaume 139.12**

Wesa-mono yipfundu ve, [Nzemi,] wee-mono yipfundu ndila wó, Nianga velê.

**Hébreux 4.13**

Yiku sisia-sueme Nzemi ti yimósi siangidi ve. Biótsi bi-li

ndila velê va misa maNzemi. Nde ni wuléka-lelani matsotso mabésa-bé mótsi.

**Actes 17.24**

Nzemi wâ-sada tsenge yótsi na biótsi bibi-li mu yo, nde ngua yulu na toto. Nde sa-tsagala mu manzo mabaata baa-tóngá na miogo ve. Nzemi basa-yamasa ve, asa-kondo tsiamba ve. Nde ni waa-fuisa baata bótsi móyi, nde ni waa-veede baata na mufudi wubaa-vóma, nde ni waa-veede bo na bikumbu biótsi. . . . Nzemi nâ-sada baata na létsugu laléku, a wuu na lendi, a wuu na lendi. . . . Nzemi asa-li vala na bésa bótsi ve.

Matthieu 13:41,42

Wâ-bongo nzim'abaata na-  
tsindaga batóma bendi bagu yulu,  
niba-masa baata bótsi babaa-  
rémbala bambegi gutso yitsuku  
siaNzemi, na móni ababaa-sa  
mamba mamabi. Niba-tete bo  
gutso mbuaga yabukeni. Gó ni  
gu bo baka-lélanga na niónganga  
minio.

Matthieu 18.8

Gogo siawe siéna ti si-li bula  
mu sada mamba mamabi, kese  
sio, we-busu vala na we, we-saala  
na lékudu. Gulu siawe siéna ti  
yisa-tsagala yitsiga yimósi ve,  
bogolo sio, we-busu vala na we,  
we-saala na lékudu. Kuati na

yende na lékudu gu mbóg'a-  
Nzemi gu baa-fua móyi mubu na  
mubu, a mu baa-na mila mioli na  
miogo, mioli, baka-tete we gutso  
yitsiga siambuaga yave-dima.

Apocalypse 20.15

Baata babâve-na mandóga mu  
yisianga siamandóga mabaata  
babaa-fua móyi, niba-tete bo  
gutso lébéla lambuaga.

2 Pierre 3.7

Na biagu yulu na biamu toto  
biamfuegi, Nzemi ka bio aa-kele,  
ndé, Bipa-baa muóna; nasi létsugu  
léNzemi aka-pasa mipama  
miabaata bótsi, na-tsóga bio mu  
mbuaga, na-gudusu babaa-  
vongolo nde bótsi.



# YIPESILI SIAMIPAMA SINZEMBI AKA-PASA 23

2 Pierre 2.9

Kumu na-laga baata babaa-yimbasa nde yipulili sibo bakapóla na niutu mu mamba mabaa-mono paga. . . . Nde mutéma aasókala mu baata bababi nasi létsugu lénde ka-pasa mipama miabo. Vââ ni va nde ka-tsisa bo sigi.

1 Jean 4.17

Tinga yiNzemi aa-mono baata ka gutso mitéma miabésa-béna yi-ka. Nzim'aChrist na yo ka na bésa-béna yi-lidi mu bulongo buu. Bésa-bé vââ mitéma mia-sóna mu tala Nzemi mu létsugu lénde ka-pasa mipama miabaata.

Hébreux 9.27

Nzemi, ndé, "Baata baa-kua léku ndila lémosi. Va yul'avââna mêe-pasa ka mipama miabo."

Apocalypse 20.12

Mê-mono baata babâ-kua keti akala—na bitutu na miyumunu—baa-tandana va busu buakung'abu-yumunu. Mênabamono bisianga baa-dibala. Nibâ-dibala na yikima, siéna siamandóga mabaata babaa-fua móyi. Nibâ-pasanga mipama miamamba mabaata babâ-kua keti akala, mabo bâ-sadanga mabâ-kóma mu bisianga muene.

Romains 9.16

A mu buvoto buabaata bo muene ve, a mu mamba mabo baasada ve, ndila mu tinga yi Nzembi nde muene aa-mono bo.

2 Corinthiens 8.9

Bé lé-yebi bu Kum'abésa-béna Jésus Christ aa-mono ting'abaata. Nde nâ-sindala buyumunu buendi, nâ-kua bututu mu niut'abésa-béna, ndé, Baata beme babaga tsongo.

Romains 5.15

Sómana gu Adam â-sómana ngidi a Nzembi gusa-yebene na tsia lé Nzembi â-sada mu tinga yindé mono baata ve. Kiti mu niut'amutu mumósi wâ-sómana

ngidi, léku lâ-kógala baata bótsi, mfua na mutu mumósi Jésus Christ, wu Nzembi â-tsindaga, tinga yindé mond ka ni yiyikabisa mambele mabaata mfua bo ve mana?

1 Pierre 5.5b

Nzembi aa-bisa baata bangua lékania. Ndee témbasa baata bamitéma miakolo maniutu.

Tite 3.6,7

Nzembi â-kógasa bésa-bé Lénioni lendi mu mutéma mumósi mu niut'a Jésus Christ. Mââ ni mandé sada, mu ndé, Bo ba-ditana neme mu tinga yimee-mo bo, babaga yifuidili siamóyi wamubu na mubu.

## Matthieu 3.2

Gelani mamba. Buyumunu bua-  
Nzembi buagu yulu ka buona  
bóna!

## Luc 13.3

Mee-lele béna, mé, "Bé lé-bisa  
mamba gele . . . , bé bótsi nilé-  
kua.

## Actes 3.19

Kaa sadani mitéma mu Nzembi,  
bé lé-gele mamba, Nzembi na-  
sindala bé mabi mama-li na béna.

## Actes 17.30

Na bukala Nzembi âsa-  
landanga bidimbala biabaata ve.  
Nde ka baata bótsi aa-lele, ndé,  
Gelani mamba.

## 2 Corinthiens 7.10a

Nzembi aa-volisi baata maniutu  
mu mamba mabo baa-sada, a go ni  
gelese guabaata mamba mu fua  
guamóyi. Ba-mana mamba gele,  
basiba-baa na mutsima ve.

## Proverbes 28.13

Baaba-suege bidimbala biabo  
basi-mono buédi ve. Babaa-meme  
bio, bo ba-niaga, Nzembi na-mono  
bo ka tinga.

## Actes 2.38

Gelani mamba, ba-batasa béna  
mu tata guaJésus Christ. Nzembi  
na-sindala mamba mabéna  
mamabi. Nde naba-vee béna na  
Lenióni lendi Labuyimba.

Esaië 55.7

Baata bababi bubue ba-niaga mamba mabo mamabi, na moni abaata bangua biku bibibi bubue ba-niaga na bo mamba mabo ba-li na mo, ba-sada mitéma mu Nzembi, nde na-mono bo tinga. Nde ni wulaa-yimbasa, asa-roko na sindala baata mamba ve.

Actes 2.38

Gelani mamba, ba-batasa béna mu tata gua Jésus Christ. Nzembi na-sindala mamba mabéna mamabi. Nde naba-vee béna na Lénioni lendi Labuyimba.

Matthieu 6.14

Bé lé-sindala bambegi mabaa-sada bé mamabi, Taat'abéna wu-li

gu yulu na nde na sindala bé mabé laa-sada mamabi. Bé lé-bisa bambegi sindala mamba mabaa-sada mamabi, Taat'abéna na nde asiba-sindala bé mamba mabé lé-sidingi mamabi ve.

Apocalypse 3.19b,20

[Jésus, ndé,] "Sadani mitéma mbuaga, bé lé-gele mamba. Me ndóga mee-temene va munio nzo, me ka dumu aa-dumu. Ngua nzo a-yóga ndag'ame, a-dibala me yo, mêê-ningala gu nzo . . ."

Marc 2.5

Jésus â-mono gu baata bâ-bóla lébiogo mu nde, nâ-lele yikata, ndé, "Muan'ame, me-sindili we mamba mawe-sidingi mamabi."

**Ephésiens 5.11**

Bisani mamba mabaata baa-sada gu yipfundu. Masa-li mabaa-fua móyi mu mo ve. Kubani, na mo. Yelesani na bambegi ti, Mamba muene bubue ve.

?Bé vââ, a ka mitéma mioli mu Nzembi ve? ?Bé lésa-yebi ti, Bé lé-nongo na baata babulongo buu, bé vââ ka Nzembi laa-bele ve? Baata babaa-tondo nongo na baata babulongo buu, bo vââ ka bavidi baNzembi. —Jacques 4.4

Yâ-sadani mitéma mu mamba mabulongo buu . . . Baata bamono nzal'amamba muene, basamo nzal'aTaata ve. Mamba mótsi mamu bulongo buu—na mamba

mabaata baa-kua nzal'amo mamu manitu mabo muene mamabi, na bikumbu bibaa-kua na nzal'abio biabulongo buu bibaa-mono, na biku bibaata baa-kakasa, bó, A bié biambuli—mamba muene mótsi masa-mata gu mbóg'a-Taata ve. —1 Jean 2.15,16

Nzembi ama-sa lésóga la-fua guamóyi gu mbóg'abaata bótsi, ndé, Ba-yaba tinga yimee-mo bo. Yo ni yiyaa-tsikasa bésa-bé mu bisa mamba mótsi maNzembi aavongolo . . . Léma-yika na sitasa mitéma mu bisa mamba mamaave-bueye, na mu baa na mamba mamayebene, na mu nongo na Nzembi. —Tite 2.11,12

## Jean 3.3

Jésus, ndé, "Mumbuli meg-lele we, mé, Baata baNzemi aave-bóta lébóta lékima basi-mono buyumunu buaNzemi ve.

## Jean 1.12,13

Baata babâ-singa Lébiga [laNzemi, Lo ni Jésus], babâ-silala na mamba maLo, bââ ni baLo lâ-sada ngudi ya-kétaga baana baNzemi. Bâ-bóta bo, a mu bunono buabaata ve, a mu bunono buabo muene ve. Wâ-bóta bo, Nzemi, mu ndé, Ba-baa baana beme.

## 1 Pierre 1.23

Nzemi ama-bóta béna lébóta lékima. Lébóta muene lésa-mata

na baata babulongo buru babaa-kua ve. Wâ-bótasa béna lébóta muene, Lébiga laNzemi lamubu, Lo lésa-gelegé ve.

## 2 Corinthiens 5.17

Baata ti bó na baChrist mutu ka mumósi, bo vââ bama-gele nzima ka kima. Biku bibo ba-bée na bio bama-niaga. Bibo ba-ka na bio ka bikima.

## 1 Jean 5.18

Bésa-bé laa-yaba ti, Baana baNzemi basaba-singana na mamba mamabi sada ve. Bââ ni baMuan'a-Nzemi aa-kele. Na mutu wumubi wóna asiba-téla na bo ve.

Ephésiens 2.1,6

Bé: lâ-baa baata ngana wó,  
Balâ-kua mu mbat'abidimbala  
biabéna na mamba mabéna  
mamabi. . . . Nzembi nâ-masa  
bésa-béna bu lâ-baadangani, nâ-  
bugusu bésa-bé na baJésus Christ  
yitsiga ka yimósi gu mbóg'ande  
gu yulu, mu bésa-béna na baJésus  
Christ mutu ka mumósi.

Galates 5.24

Baata baJésus Christ bama-  
bugu lébuli na nde mu fuana nde  
ngana bu ndê kua mu mbat'a-  
kurusu. Bo vââ basa-seeli na  
mamba mabo muene ve mabo bâ-  
kuadanga na nzal'amo, na mabo  
bâ-tondongo mo.

Bésa-bé ngana wó, Baléma-kua  
gu ngul'amamba mamabi, ?mââ  
léba-gabagalani na mo sada? . . .  
Kaa yabani bé muene ti, . . .  
Bésa ka mu niut'aNzembi laa-  
kémba, mu bésa-baJésus Christ  
mutu ka mumósi. -Romains 6.2,11

Christ â-bongo mbel'abésa-béna  
mu niut'ande, nâ-kua mu mbat'a-  
kurusu mu ndé, Bésa-bé lé-  
kagagani na mamba mamabi,  
bésa-bé lé-baa na mamba mendi  
mamabue . . . —1 Pierre 2.24

Bé balâ-baa baata ngana wó,  
Balâ-kua mu mbat'amamba mabé  
lâ-sadanga mamabi . . . Nzembi  
ama-fuisa bé móyi mu niut'a-  
Christ. —Colossiens 2.13b

Romains 6.23

Musend'abaata bababi, léku. To si Nzembi, aa-veede mu ting'a baata yindee mono ni fua guamóyi wamubu na mubu mu bó na ba Kum'abésa-béna Jésus Christ mutu ka mumósi.

Jean 5.24

Jésus, ndé, "Babaa-yóga mamba meme na babaa-silala mamba mamu niut'a Wâ-tsindaga me, a bââ bama-fua móyi wamubu na mubu, basiba-vee bo mambele ve. Bo vââ bama-mata gu léku, bo ka mióyi ba-ka."

Galates 6.8

Baata babaa-sada mamba mabo muene mamaa-mata gu mióyi

miabo, sikala sikala, tsongo ka ve, ndila ka léku lamubu. Baata babaa-sada mamba mamaa-mata gu mbóg'a Lénioni Labuyimba, sikala sikala fua guamóyi wamubu na mubu mu niutu Lénioni Labuyimba.

[Jésus â-bondo, ndé,] "Fua guamóyi wamubu na mubu ni yika na we, we Nzembi mumósi pénza, na móni ame, Jésus Christ, wuwê-tsindaga." —Jean 17.3

Baata babaa-silala mamba mamu niut'a Muan'a Nzembi bama-fua móyi wamubu. Babaa-bisa mamba mendi yóga basi-fua móyi ve, na kési a Nzembi yisaka-fua na bo ve. —Jean 3.36



Laa-yabani ti, Bésa-baNzemi mutu ka mumósi. Laaba-yabani ná ti, Nzemi gutso mitéma a-lidi, mu ndé tsindaga bésa-bé Lénioni lendi. —1 Jean 4.13

1 Jean 3.18,19

Baana beme, lé-niagani lele gua-ti, Me ka ting'abambegi mee-mono, ndila mu yambala na minio pénta. Lé-sadalani bambegi mamba mabaata baa-yaba, bó, Bo na ting'abambegi. Vââ ka ni va léka-yabani ti, Bésa-bé lé-ka na mamba mambuli, mitéma mima-sóna va misa maNzemi.

1 Jean 3.24

Babaa-kele mandóngi ma-Nzemi baa-bambana na Nzemi,

bó na bo mutu ka mumósi. Nzemi na nde ka gutso mitéma miabé a-ka. Lénioni Labuyimba léNzemi â-tsindaga laa-yabasa bésa-bé, ndé, Nzemi gutso mitéma miabésa-béna a-ka.

[Jésus, ndé,] “Baata babaa-yaba mandóngi meme, bo ba-sada mamee-lele bó, mé, Ba-sada, bââ ni babaa-tondo me. Babaa-tondo me, bo ni baTaata na nde aa-tondo. Me né meni-tondo bo, meni-yikasa bo ná mamba mamu niut'ame. —Jean 14.21

Lénioni Labuyimba laa-silala mutso mitéma miabésa-béna, ndé, Bésa-béna ka baana ba-Nzemi. —Romains 8.16

32 CHRIST TI GUTSO MUTEMA, MUTEMA  
KA NGOMBO

Mema-bugu lébuli na Christ,  
mu mé, Me neme me-baa ngána  
wâ-kua mu mbat'akurusu.  
Mesa-seeli mu me muene ka ve.  
Me ka móyi mee-fua mu mbat'a-  
Christ waa-tsagala gu mutéma.  
Mamba mame-ka mu sada, me  
mo mee-sada mu silala gu mee-  
silala mamba mamu niut'a-  
Muan'a Nzembi. Nde ni wâ-  
mono ting'ame, nâ-sindala  
niut'ande mu me. —Galates 2.20

Jean 15.11

[Jésus, ndé,] “Me-bée me-  
léli béna mamba muene, mu  
mé, Bubue bu mee-mono, bé

na bé lé-mono bu. Bubue  
muene bé lesiba-kaya ve.”

Wubé laave-mono, bé ka nde  
laa-tondo. Nde ni wubé lé-ka  
mu silala mamba mamu niut'-  
ande, bé nde ki pa-mono ve.  
Bé ka ngombo laa-mono  
yalótala, bé lési-tóga ti yo  
sópala ve. —1 Pierre 1.8

Jean 17.13

[Jésus, ndé,] “Me ka gu  
mbóg'a Nzembi mee-yende. Me  
mamba muene mee-lele mu me  
ki mu bulongo bûu, mu mé,  
Bubue bu mee-mono, bo na bo  
ba-mono, na bubue muene  
basiba-kayi ve.”

**Romains 6.16**

Bé dimbala laa-dimbala ti,  
Bé lé-singana na maniutu  
veede gu mbóg'amutu mu  
yimbasa nde, bé vââ ka  
bavéga bawóna wubé laa-  
yimbasa. Bé ka bavéga  
bamamba, ti mamabi, sikala  
sikala ka léku; ti mabuyimba,  
sikala sikala ditana na Nzembi.

**Deutéronome 11.26-28**

Monani! Na misanga na  
misibala! Solani bibé laa-tondo.  
Bé lé-sada mamba ma-  
Nzembi aa-lele, ndé, Bé lé-  
sada, bé nilé-baga misanga.  
Bé lé-bisa sada maNzembi aa-

lele, ndé, Bé lé-sada, bé lé-  
niaga na nzila yimee-laga béna,  
bé lé-yimbasa bikoko biabéna,  
bé nilé-mono misibala.

**2 Thessalonicens 1.7,8**

Bé balaa-mono mimbondo,  
Nzembi na-kanisa bésa-béna  
maniutu mu létsugu léKum'a-  
bésa-béna Jésus aka-póla gu  
yulu bó na batóma bendi bagu  
yulu, bo bangua ngudi. Niba-  
yada gutso muludi ambuaga. Va  
Jésus aka-yada, na-tsisa baata  
babaa-tóngala, bó, Nzembi tsia  
ve, sigi, na móni abaata babaa-  
kóbala matsanga maKum'a-  
bésa-béna Jésus mamabue.

# BAATA BUBUE BA-MEME, BO, JESUS KA KUMU

1 Jean 2.23

Babaa-bisa Muan'a Nzembi, na móni a Taat'ande bá-bisi, Babaa-yaba Muana, baa-yaba na Taat'ande.

Romains 10.9

Bé ti laa-meme na minio ti, Jésus ni Kum'abésa; bé ti laa-yaba mu mutéma mumósi ti, Nzembi â-sóla nde gu léku lëndê kua, bé nilé-fua móyi.

Matthieu 10.32, 33

Baata babaa-meme me va misa mabambegi, me vââ me neme meni-meme bo va misa ma Taat'ame gu yulu, mé, Bo baata beme. Baata babaa-bisa me va misa

mabambegi, me vââ me ne meni-bisa bo va misa ma Taat'ame gu yulu, mé, Mesa-yebi bo ve.

1 Jean 4.2

Yógani bu bé léka-yaba mamba mamaa-mata gu mbóg'a Lénióni Labuyimba. Baata babaa-meme, bó, Jésus Christ nzim'abaata â-bongo; bââ ni baba-li na Lénióni La Nzembi Labuyimba.

Baata babaa-bisa me mu tsóni, na móni amabiga meme, me Wâ-bongo nzim'abaata va meka-yada bésa-batóma ba Nzembi bagu yulu babuyimba na buyumunu bua Taat'ame, vââ ka ni va me neme mekaba-bisa bo. --Luc 9.26

**Actes 26.18**

Mee-tsindaga we, mé, Baata baniaga mamba mayipfundu, basada mamba mayivele. Ba-matagu miogo miaSatan, ba-kalaga mitéma mu Nzembi, ba-singa, bó, Me Kum'abo wubaa-fua móyi mu nde; me-sindala mamba mabo ba-sidingi mamabi. Bo vââ niba- bugunu na baNzembi â-bânda, ndé, Ba-baa beme.

**Matthieu 4.1, 10, 11**

Vââ ka ni va Lénióni Labuyimba lâ-béta Jésus gu yitsiga sialégengi mu ndé, Diable a-sombo nde. . . . Jésus nâ-lele nde, ndé, "Mata vââna na mukasa, Satan! Bâ-kóma mu

yisianga siamamba maNzembi, bó, Gobisi Kum'awe Nzembi, we-yimbasa nde péenza." Diable ayóga bóna, nâ-mata vââna. Vââ ka ni va batóma baNzembi bagu yulu nibâ-bakasa Jésus va yitsiga muene mu témbasa nde niutu.

**1 Pierre 5.8**

Kamani mitéma. Baadangani na bungósa. Muvidi abéna diable ngana wó, Yimbungu sisia-viana baata, singa sia-singa, ndé, Me-kuata bo, me-tsia.

Bongani biluenili biaNzembi bindee veede béna biótsi. Bié ni bibia-sítasa bé mitéma mu bisa mamba madiable mandee sombo béna. —Ephésiens 6.11

Jacques 4.7, 8a

Kotolani Nzembi. Bisani diable, na-bata béna vala. Sadani mitéma mu Nzembi, nde na nde na-sa mutéma mu béna.

1 Jean 3.8b

Diable ni wâ-sadanga bubi keti atsómi nasia lolo. Muan'a-Nzembi â-yada, mu ndé, Me-mana misama miadiable.

Marc 16.17

[Jésus,ndé,] "Baata babaka-silala mamba mamu niut'ame... nibafunzungu badéma mu tata guandóg'ame."

Romains 8.35, 37

Siyika-bóma yinongo siabésa-béna na baChrist ka yiki. ?Ka mi-

mbondo? ?Ka niutu bubi? ?Ka ngusu yibaa-sa? ?Ka nzala? ?Ka kua guabututu? ?Ka bibia-bóma baata peti bio? ?Ka léku lélaa-kua? Mu mamba muene mótsi, bésa-béna lésa-seeli na yibeyi ve. Bésa-béna mitéma mima-sónnda mu ngudi awaa-tondo bésa-béna.

2 Corinthiens 10.4

Biluenili bilaa-luanani na bio, a bibaata baa-luana na bio mu paba guamaniutu ve. Bio biaNzembi bibinono. Bio bia-tsamana mumua-tsagala diable. Bio ni bilaa-kegese baata babaa-kuata paga mu mamba mamu niut'a-Nzembi.

# BAATA BAJESUS, BANGUA TING'ABAMBEGI 37

[Jésus, ndé,] “Bé ti laa-monono ting'abambegi pfuesi abé muene na bé muene, vââ ka ni va bôtsi baka-yaba, bó, A, bââ, baata baJésus.” —Jean 13.35

1 Corinthiens 13.1

Me na yambala mandaga mamaa-yambala baata bamakaka mótsi na mamaa-yambala batóma baNzemi bagu yulu, me ti ting'abambegi mono ve, mamba mamee-yambala mââna ka ngana wó, . . . Pamba yibaa-tsókasa.

1 Jean 3.14, 4.20

Laa-yabani ti, Bésa-bé léma-yagana na léku, bésa-bé ka móyi laa-fua mu tinga yilaa mono bambegi. Babaave-mono ting'aba-

mbegi, ki gutso léku ba-kini. Mutin-lele, ndé, Me Nzemi meetoondo, mââ nde ndila mbegi aabele, nde vââ ka kutu aa-kutu. ?Ki muan'aTeyi wundee mono asa-mo ting'ande ve, mfua na Nzemi wundee ve-mono, wundee yóga tsang'andóg'ande, nde ka ni wunde ki-mono ting'ande?

Mamba mamaa-mata gu mbóg'aLénioni Labuyimba: na ting'abambegi, na ngombo, na mutém'asóna, na kama guamutéma, na yingaga, na sada guamamba mamabue, na yibeyi siamamba siyibue, na butsóga, na sitasa guamutéma mu bisa mamba. —Galates 5.22, 23a

Bésa ni balâ-monongo môtsi mandê sadanga . . . Bo nibâ-komini nde mu mbat'akurusu, bó, A-kua. A-mana tsugu yohi, mu lamutata Nzembi-nâ-sôla nde gu léku, ndé, A-monono na baata. A na peti baata ve, ndila na bésa bandê bânda, ndé, A bââ bimóni. Bésa-bó ni balâ-tsiadanga na niotongo va yul'asóga guendi gu léku. —Actes 10.39-41

Tsugu tsamba, mu lamupombo, baata baJésus nibâ-buana gu tsin'anzo. Thomas na nde â-baa bó na bo. Nzo yâ-baa bâ-béndaga. Nibâ-kémaga Jésus vatso bo. Nde nâ-lele bo, ndé, "Polo na bēna yika!" Nde nâ-lele Thomas, ndé,

"Kukulu vaa, we-bembe na yividi siava tsin'alébenzi siba-rumi lékongo sii. Nia pfudu kuata, me mumbuli me-sugi." "Thomas nâ-lele nde, ndé, "A Nzembi, we ni Kum'ame!" —Jean 20.26-28

#### Romains 4.25

Jésus muene ni wubâ-sindala, bó, A-kua; mu mbat'amamba mabésa-bé lâ-sadanga mamabi. Nde nâba-sóga mu bégasa bésa-béna va misa maNzembi.

#### Marc 16.9

Jésus a-mana sóga na makiaki matsono, nâpa-monono na Marie mamuisi Magdala. Mukaasa muene ni wundê pósa badéma tsamba babâ-baa gutso niut'ande.



# SOGA GUAGU LEKU NI TSONG'ABAATA BAJESUS

39

Matthieu 16.21

Jésus â-banda baata bendi lébala mamba ndila ka velê, ndé, "Bubue mepa-too gu Jérusalem. Bivónda biabaata bó na bivónda biababóndili babaata Nzembi, na basupili bamabiga maNzembi niba-muese me mimbondo mfua mio ve, niba-kese ndunzi ame, bó, A-kua. Me-mana kua, tsugu yoli, mu lamutata, meni-sóga."

Jean 5.25, 28, 29

"Mumbuli meebe-lele béna, mé, Lécese ka bele lé-ka na yada lébaata babâ-kua kala baka-yóga ndag'aMuan'aNzembi. Lo béé léma-ya. Babaka-yóga yo niba-fua

móyi. Yâ-yitsani mamba muene. Lécese labusu baata baba-li mutso mangila baka-yóga ndag'ame. Bo ndila ka póla. Babaa-sada mamba mamabue niba-sóga mu fua guamóyi. Babaa-sada mamba mamabi, niba-sóga mu kua guamambele.

Romains 6.4b, 5

Bu Christ â-sóga mu ngudi aTaat'ande yalótala, bó ni bu na móni abésa-béna lâ-baga ngudi na nde ya-gele manzima makima. Bésa-béna ti léma-mana bugu lébuli na nde mu léku léndê kuada, ka na móni amu sóga gu ndê sóga léma-mana bugu lébuli na nde.

## Hébreux 12.14

Guadani na lembanda sada mu baa lingi bé na bambegi na mu baa na mitéma miatendege. Babaave-na mitéma miatendege basaka-mono Kumu ve.

## Ephésiens 1.4

Nzemi â-bânda bésa-béna mu niut'aChrist, ndé, Niba-baa beme, ndé baa ki asa-si tsenge yótsi ki ve, mu ndé, Bo baka-baa na mitéma vele, tsia ni tsia ve, na lébaa-dimbala ti lémosi ve va misa meme.

## 1 Pierre 1.2

Bé ni baNzemi â-solo, ki bé bóta ve. Ndé bânda béna, ndé, Bo

ni baLénioni leme léka-tendele mitéma; mu ndé, Baka-yimbasa me, bo baka-bueye mu mbat'anzin'a-Jésus Christ. Yo yâ-pógaga mu niut'abaata bótsi. Mee-bondo Nzemi, mé, A-vee misanga mfua mio ve gutso mitéma, mio mi-baa miasónnda mbiû!

## 2 Corinthiens 7.1

A baweyi, mââ ni mandegi ma-Nzemi â-sada bésa-béna. Kaa léki-bisani mamba mamabi mótsi mamaa-ganza bésa-béna maniutu na manióni. Lé-baadani na mitéma velê, lé-monani Nzemi bomu mu bitsegili biabésa-béna.

**Hébreux 13.12**

Mââ ni maJésus à mono mimbondo, na nde, gu tsomb'abôla, ndé, Me-tendele baata mitéma na nzin'ame.

**1 Jean 1.9**

Bésa-bé lé-tubu mamba malé-sidingiani mamabi, Nzembi vââ na-sindala bésa-bé mitéma mamba mamabi, ma-fua mótsi. Nde mi mut'ayebene, nde na mamba malédita.

**Matthieu 3.11**

[Jean, ndé,] "Batéma yimee-vee bena yii ndila yamâmba pénza yati, Bé léma-gele mamba. To waa-yada gu mbisa ni wuka-vee bena batéma yaLénioni

Labuyimba na yambuaga. Nde lutili me ngudi. Mesi-bueye ti bapondo bendi bembe ve.

**Luc 1.74, 75**

Nzembi, ndé, Meni-diba bena na babaa-vida bena. Bé léka-yimbasa me, bé bomo mono ve.

Kaa bongani nzima yiyaa-mata gu mbóg'a Nzembi mu sada mamba mamaa-bueye, bé lé-baa na mitéma velê. Mamba maJésus ni mamaa-gelese bé mamba muene. —Ephésiens 4.24

**2 Pierre 3.11**

Biku biótsi nibi-sólana na mbuaga. Bé vââ mu bitsegili bibé lé-li na biq ka hû léki-sa. Bé bubue lé-baa balaa-bambana na Nzembi.

# 42 BAATA BALENIONI LABUYIMBA LAA-KOGALA

## BOIMU MITEMA

Romains 8.9

Bé lésa-seeli na mamba muene ve. Bé ndila ka mamba maLénioni Labuyimba laa-duku, tsâga ti Lénioni Labuyimba laa-tsagala mu mitéma miabéna. Baata babaave-na Lénioni Labuyimba mutso mitéma basa-li baata bendi ve.

Actes 1.8a

Lékese léLénioni Labuyimba léka-yada gu mbóg'abéna, bé nilé-baga ngudi, bé léka-simbalanga mamba mamu niut'ande.

Actes 4.31

Bo ba-mana Nzembi bondo, yitsiga sibo bâ-kókana nisiâ-

tsoka. Lénioni Labuyimba nilâ-kógala bo bôtsi mu mitéma. Bo nibâ-yambala ka mamba ma-Nzembi na bukidi.

Etienne wuLénioni Labuyimba lâ-kógala mu mitéma nâ-simbala misa gu yulu, nâ-mono buyumunu buaNzembi na bu Jésus â-baa mutele va ngul'ambagal'a-Nzembi. —Actes 7.55

Luc 11.13b

Kiti bé baata balé-li bababi lé-yebi veede baana babéna bikumbu bibibue, mfua na Taat'abésa-béna wu-li gu yulu ka ni wuki-kondo veede babaa-bondo nde Lénioni Labuyimba?

# MANDEGI MANZEMBI MAGU MBOG'ABAANA BENDI

43

1 Pierre 4.12, 13

A baweyi, yâ-kémagani mamba mamimbondo miminono mibé laa-mono mimia-tsitsa bé mitéma, bé ti, Mamba maa, mo gû maa-mata. Monani ngombo mu bé léma-bugunu na Christ mu mono mimbondo mindê monongo. Va nde ka-yada na buyumunu buendi, vââ ka ni va bé léka-sangala nde na ngombo.

Apocalypse 21.4

Nde na-kaniasa bo matsanga mu misa, léku lésakaba-baa ve. Baata basaka-baa na makondo ve, basakaba-léla ve, basakaba-mono mangengi ve. Mamba

maketi akala mama-fua.

Jacques 1.5b, 6a

Nzemi aa-veede baata bôtsi mu mutéma mumósi, asa-sada ti tsémba ve. Waa-vondo, a-vondo mu mutéma mumósi, ndé, Menibaga; a mu mitéma mioli ve.

Matthieu 28.20b

Yabani ti, Me na béna meli tsugu yótsi nasi ka fua mamba mabulongo buu.

Hebreux 12.7a

Sókalani mitéma mu sigi yi Nzemi aa-tsisa béna. Nzemi aa-mono bé, ndé, Bé baana beme. ?Bé laa-mo taat'amuana waave-tsisa muan'ande sigi?

# 44 MANDEGI MANZEMBI MAGU MBOG'ABABAA- MONO MAMBA PAGA

1 Corinthiens 10.13

Mabaa-kanasa bena, mo, ni  
mabaata bôtsi baa-mono. Nzembi  
asa-dimbala mamba mandee lele,  
ndé, Meni-sada ve. Asi-singasa,  
ndé, Ba-kanasa bena, mamba  
mamanono mabé laave-tôga sinda  
mitéma ve. Ba-kanasa bena,  
Nzembi na-laga bé yipulili siamu  
mamba muene, na-sitasa bé  
mitéma.

Hebreux 2.18

Ndê monongo mimbondo mu  
tsitsa gu bâ-tsitsanga nde  
mutéma, nde vââna na-tembasa  
baata maniyutu babaa-tsitsa na bo  
mitéma.

Jacques 1.12

Buédi bu-li na baata babaa-  
sitasa mitéma mu bisa mamba  
mabaa-kanasa, bo mamabi.  
Mitéma mi-mana sita mu bisa  
guamamba muene mamabi, bo  
vââ niba-fua móyi. Lé ni lé Nzembi  
â-sada ndegi, ndé, Meni-sada bé  
balaa-tondo me.

Romains 8.28

Bésa-béna laa-yaba ti, Baata  
babaa-tondo Nzembi, bo na  
ba-mono mamba mamabue, bo na  
ba-mono mamba mamabi, Nzembi  
ni waa-sadasa mo mótsi, ndé, Ma-  
sada bo bubue.

# MANDEGI MAJESUS MAGU MBOG'ABABAA. 45

## SOKALA MITEMA MU MAMBA

### Apocalypse 3.5

Babaka-sókala mitéma mu mamba, bo ni babaka-luata bilueti biafuku. Mesaka-bunzulu mandóga mabo mu yisianga sieme siamandóga mabaata babaa-fua móyi ve. Meni-meme bo va misa maTaata'ame na va misa mabatóma bendi bagu yulu, mé, Bââ baata beme.

### Apocalypse 2.7

Baba-li na matchui buesi mu yóga mamba, bubue ba-yóga maLénióni Labuyimba laa-yambala na baata baMabundu meme! Ndé, "Babaa-sókala

mitéma mu mamba meme, meni-tsiadasa bo biéla biamuti waa-fuisa baata móyi. . . ."

### Apocalypse 2.26

Babaka-sókala mitéma mu mamba meme, babaka-kele na mamba meme kii na guka-sika tsenge, meni-vee bo buyumunu bua-géda baata bamakaka mótsi.

### Apocalypse 3.21

Babaka-sókala mitéma mu mamba meme, bésa-bo nilé-tsagala va kuang'ame ya-buyumunu. Mê-sókala weme mutéma mu mamba meme, mênaba-tsagala bésa-Taata va kuang'ande yabuyumunu.

Matthieu 5.32a

Lébagala a-tembaga mukedi ande, mukedi ti asa-li yivesi ve, nde vââ a-legi mukedi nzila mu sada buvesi na babagala bakima.

Luc 16.18a

Lébagala a-tembaga mukedi ande, aba-kuele mukima, nde buó bundiga aa-sada. Na móni lébagala aba-kuele mukaasa wumulumi ande a-timbigi wóna, nde buó bundiga aa-sada.

1 Corinthiens 7.10, 11

Me ka mandóngi mee-longo babama-mana kuelene, to a me ve. Waa-longo bo, Kumu. Mé, Bakedi baya-kagaga na balumi babo.

Mukaasa ti aa-kagaga na mulumi ande, a-baada nde penza, ayâba-kuelene. A-tondo, a-gabaga na mulumi ande, mulumi ayâ-bisa nde.

Romains 7.2, 3

Mangidi maNzembi maa-guasa lékuele lamukedi na mulumi va bo baboli ba-ki mióyi. Mulumi a-kua, mukedi asa-seeli na ngidi yinde béé na yo bó na mulumi ve. To mulumi ki móyi, mukedi abayende lékuele lékima, nde buó bundiga. To mulumi a-kua, mukedi asa-seeli na ngidi yabayende lékuele lékima ka ve. Nde na ba-kuelene na lébagala lékima, a buó busa-seeli bundiga ka ve.



**Apocalypse 16.15**

[Jésus, ndé,] “Bu mubongi aa-ya yitsundi atsundi, bó ni bu me ne meka-yada yitsundi atsundi. Buédi buka-baa na baata baba-li na lémbanda la-tala me . . .”

**Luc 12.40**

“Bé na béna kaa rambalani, bé lé-baa misigi. Bé léka-kémaga me Wâ-bongo nzim'abaata yitsundi atsundi.”

**Marc 8.38**

“Baata babaa-bisa me mu tsóni na móni amabiga meme va pfuesi abaata bamfuagi, babaa-póla Nzembi lévu, bo sadanga ndila mamba mamabi, me Wâ-bongo

nzim'abaata, va meka-ya bésa-batóma baNzembi bagu yulu na buyumunu buaTaata'ame, vââ ka ni va me neme mekaba-bisa bo.”

**Jean 14.3**

“Me-yende, me-mana bitsiga vanga, meniba-ya guni mu yibongo béna. Mee-tondo, mé, Bésa bótsi léka-baa gu me-li góna.”

**Matthieu 24.30**

Yilémba siaMe Wâ-bongo nzim'abaata niyi-póla gu yulu. Baata bamakaka mótsi baka-léla makondo, baka-mono Me Wâ-bongo nzim'abaata mee-sótaga gutso mabungi na buyumunu bueme bualótala na buyimba.

Baata baka-mono Wâ-bongo  
nzim'abaata aa-sótaga gutso  
lêbungî na buyumunu bualótala  
na buyimba. —Luc 21.27

Matthieu 16.27b

[Jésus, ndé,] Va meka-yada  
bésa-batóma baTaat'ame bagu  
yulu na buyumunu buaTaat'ame,  
meni-kala baata mapéla mu  
mamba mabo bâ-sada.

[Batóma baNzembî bagu yulu]  
nibâ-fulu bo, bó, "A babagala  
babisi Galilée baa, bé muki laa-  
temene vaa mu talanga gu yulu.  
Jésus muene wuNzembî a-kumisi  
gu yulu va misa mabéna, bu bé lé-  
móni bu nde kumi, bó ni bu nde  
kaba-yada muunumu. —Actes 1.11

Bu muvédi avédi aa-vedene  
kueyi na gu ngulu yilétedi laa-  
kóma, bé léba-tala kueyi na gu  
ngulu yilétedi laa-yénde, bó ni bu  
me Wâ-bongo nzim'abaata meka-  
yada. —Matthieu 24.27

Jacques 5.8

Bé na béna, sókalani mitéma.  
Guasani mio. Léyada laKum'a-  
bésa-béna ka bele lé-ka.

1 Jean 3.2

A baweyi, bésa-bé ka baana ba-  
Nzembî. Lésapa-tsikasani mamba  
maléka-baadani na mo gu busu ve.  
To lé-yabani ti, Va Christ aka-  
yada, léka-baadani na nzim'ande  
mu mono guande na misa.

Nzemi ni wâ-kómasa baata mabiga mendi mótsi. Mo maa-bueye mu yabasa baata bimbuli, na mu kegese babaa-dimbala, na mu yelese baata, na mu yigasa bo bu baka-sada mamba mamabueye. —2 Timothée 3.16

Luc 21.33

[Jésus, ndé,] “Na yulu na toto nibi-fua biótsi, to mabiga meme masaka-fua ve.”

Hebreux 4.12

Mabiga maNzemi ma-li bunono, maa-tabala baata mitéma. Mo ngana wó, Mbédi lébaka, yi-li ngulu ménga, ngulu ménga. Mo maa-kagala mufudi

na lénióni. Masa-sika ndila mu mayulu pénsa ve, na mutso mapapanga. Mo maa-pósa mamba mabaa-vanga gutso mitéma na mabaa-suege.

Jean 6.63

Manióni ni mamaa-fuisa baata móyi. Niutu tsongo ve. Mabiga mame-léli béna ma-li maLénióni Labuyimba. Mo ni mabaa-fua móyi mu mo.

Mee-kele mabiga mawe mu mutéma, mé, Mesa-sa mawee-bele. —Psaume 119.11

Psaume 119.105

Mabiga mawe ma-li ngana wó, Lembi waa-yalala me nzéla.

Published in numerous languages by World Missionary Press as God supplies funds in answer to prayer. Other booklets are also available. If you would like more copies for careful distribution, write in English to:

World Missionary Press, Inc.  
P.O. Box 120  
New Paris, Indiana 46553-0120 USA

Gabon

NZB

198 Nzebi